

EXAMEN
EPISTOLÆ
ET PARTIS PHYSIO-
LOGIÆ DE EXAMINE SA-
garum per aquam fri-
gidam;

à

GVILHELMO ADOLPHO
*Scribonio, Medicina & Philosophiæ Do-
ctore, diuersis temporibus in lu-
cem editarum:*

Concinnatum à quodam

IGNOTO PATRONO VERITATIS.

[See note on preceding page.]
*Epistola Scribonij, quæ examinatur, in fine
adiecta est.*



E

E

2



ut
bu
ali
fun
co
op
co
pu
lic
ten

EXAMEN EPISTOLAE
ET PARTIS PHYSIOLOGIÆ
SCRIBONIANÆ DE EXAMINE
sagarum per aquam frigi-
dam.

CAPVT I.

*Qualem se homo philosophus in redarguendis
aduersarijs præbere debeat, quodq; aduersa-
rios mortuos aut lingua aut calamo aut qua-
cunq; alia ratione contumeliosè perstringere
indecorum sit & philosopho indignum.*

IN scholis philosophorum vete-
rum, quòd in disquisitione ve-
ritatis humani ingenii acie im-
peruestigabilis versarentur, pro-
ut quisque probabilibus ducebatur rationi-
bus, ita vel hoc vel illo modo de quæstione
aliqua statuere liberrimè poterat. Conces-
sum etiam erat, à quibus aliquis dissentiret,
eorum sententiam contrariis argumentis
oppugnare: idque non tantùm in priuatis
congressibus, verùm etiam in publicis dis-
putationibus & magna auditorum corona
licebat. Integrum etiam erat, si quis suæ sen-
tentiaë stabilimenta, aduersæ autem infir-

mitatem publici iuris facere, & ad posteros transmittere vellet. Hæc, inquam, omnia in veterum scholis citrà cuiusquàm reprehensionem mittebantur: ea tamen lege, vt à defensione falsi dogmatis pertinacia, à defensione affectus, à refutatione virulentia & alia quæuis inamodestia abesset. Atque ea consuetudo, tanquam haud illaudabilis, in Christianorum quoque scholis locum inuenit.

Verum enim uerò omnibus seculis reperti sunt, & etiamnum reperiuntur haud pauci tam præfracto & intractabili ingenio homines, vt conuicti etiam quodlibet potius vadimonium, quàm semel coeptam sententiam, licet cum pietate & religione è diametro pugnantem, deferere mallent. Qui si ab aliis cordatioribus viris ab errore in viam reducantur, indignè ferunt; & cum aliter tueri se nequeant, in calumnias atque conuicia & lingua & calamo toti prouunt. Nec desunt, qui id vnum operam dant, vt iis quos odio habent, aut quorum gloriæ inuidet, vel rectè sentientibus canino more oblatrent: à quibus quicquid bene dictum vel factum est, id prauis interpretationibus vitiant, & illepidis sarcasmis vulgo contemptum reddere conantur. Atque ytinam nostra hæc

stra hæc ætas tam male-feriatorum ingeniorum non esset superioribus illis longè feracior.

Cùm verò omnis in contradicendo intemperantia vitiosa est, tum vel illa maxime, quæ in viros de rep. & re literaria præclare meritos, & iam ætate graues exercetur: magisque si illi, solutis per mortem animæ & corporis compagibus, in hominum consortio esse desierint. Omnibus in ore est vulgata illa & ab ipsa honestate dictata sententia: *De absentibus non nisi bona*. Hac admonemur, si inter colloquendum absentis alicuius mentio incidat, eam non nisi honorificam esse debere. Quod si ita est: si, inquam, de hominibus viuis adhuc ea sermonis moderatione loquendum, ne vel absentum honor minima ex parte violetur, quanto maiore studio id ipsum erga vita defunctos obseruandum est? Quid enim aliud sibi apud veteres apparatus funebris, vestitus lugubris, præficæ, epitaphia, cenotaphia, parentalia, aliaque eiusmodi aliud voluerunt, quàm eos, qui virtutem & pietatem viui coluissent, ne mortuos quidem esse dehonestandos?

Atqui, inquires, ista amicis de mortuis, iisq; à quibus læsi nunquam sumus, debent

tur, non autem aduersariis aut hostibus, qui quouis modo molesti nobis fuerunt: Quorum laudes decantare post obitum velle, extremæ fuerit dementiæ. Ego verò nequaquam, inquam, si laudabilem inter homines vitam duxerint, tantum abest, ut rebus humanis exemptos odiosè censeam flagellandos. Scitissimè Ouidius:

Pascitur in viuis liuor, post fata quiescit.

Facile quidem est mortuos, quia non mordent, iugulare; at quàm facile, tam est inglorium. Qua in re insigne est Pausaniæ Spartani exemplum, qui dux ad Plateas, cum hostium copias fudisset, tã moderatè illa sua victoria usus est, ut, cum quidam auctores ei essent, ut capita Persicorum ducum occisorum cruci affigeret, atque isto modo Persarum, qui simili contumelia Leonidam regem affecerant, crudelitatem vlcisceretur, responderit, se mortuos nulla contumelia affecturum esse, ac sibi satis esse si iusta dicens & faciens Spartanis suis placeat.

Nec prætereundum, quod apud Sophoclem in Antigone extat. Cum Creon Polynicis cadaueri sepulturam concedere nollet, Tiresias sepeliendum suadens his verbis eum alloquitur:

'AM'

Ἄλλ' εἴκε τῷ θανόντι, μηδ' ὀλωλότα
 Κέντει, τίς ἀλλή τὸν θανόντα ὅπικτανεῖν;

Id est;

*Ignosce mortuo, nec eum qui extinctus est
 Pungas; quis honor necare denuò mortuum?*

Narrat Homerus, Græcos Hectoris ab
 Achille interfecti cadauer circumstantes,
 in mortuum conuiciis, in cadauer ferro sæ-
 uuisse. De quibus Iliad. χ. sic canit:

— Ἄλλοι δ' αἰδράμον ἦες ἀχαιῶν
 Οἱ καὶ θνήσαντο φιλῶ καὶ εἶδ' ἀγνὸν
 ἔκτορα, ἔδ' ἄρα οἱ τις ἀνέστηγε παρῆσιν.

Hoc est;

*Concurrunt reliqui cinguntq; cadauer Achiui;
 Defuncti eximiam speciemq; modumq; stu-
 pentes
 Hectoris, inflicto & nisi vulnere nemo re-
 cessit.*

Et paucis interiectis:

Ὡς ἄρα τις εἰπέσκε, καὶ ἐτήσασκε παρσάς.

Hoc est;

Dixerat hoc astans aliquis; mox vulnera fecit.

Quid verò Græci beluina illa sua crudeli-
 tate aliud cōsecuti sunt, quàm dedecus æter-
 num & ignominiosum illud epigramma, in
 quo sic eos alloquens introducit Hector?

Βάλλετε νυνὶ ὅπ'ι πότμον ἐμὸν δέμας, ὅτ' καὶ αὐτοὶ
 Νεκρῷ σῶμα λείοντο ἰφυβείζουσι λαγαῖ.

A iiiij

Hoc est;

Figite nunc ferro nostrum post funera corpus,

Extincto insultat leporum quoque turba leoni.

Ad eundem planè modum etiam illi, qui mortuos ore, vel calamo, vel alia quacunque ratione odiosè incesunt, non meliori nota, quàm illi nomen suum immortalitati consecrant. Itaque Plancus (ut C. Plinii ad D. Vespasianum præfantis verbis utar) non illepidè: Cùm diceretur Asinius Pollio orationes in eum parare, quæ ab ipso aut liberis post mortem Planci ederentur ne respondere posset: Cum mortuis, inquit, non nisi laruas luctari: eoque dicto sic percussit illas, ut apud imperitos nihil videretur impudentius.

C A P V T II.

Apostrophe ad Scribonium; in qua inter alia ei vitio datur, quòd petulanter in Evuichium debacchatus sit, quodque ipso iam mortuo Physiologiam suam in publicum emisserit.

HAEC tibi, Scriboni, ad quem nunc sermonem conuerto, ob oculos ponuntur, tibi perpendenda offeruntur. Ecquid enim horum est, quod abs te alienum docere pos-

re possis? Erroris tui de causa supernationis Sagarum, cum per aquam frigidam explorantur, ab Evuichio, Neuvualdo, Goclenio viris eruditissimis commonefactus, acerrimum scilicet adhuc te præbes propugnatores. In Oleuiani & Piscatoris Dialecticas commentationes, cum ne verbo quidem vnquam te læsissent, illiberalissimè calamum strinxisti. Neuvualdum ex delirio ad saniores mentem te reuocantem, insolenter exagitasti. Quodque publico omnium odio dignum est, Evuichii senis optimè de Rep. & schola Bremensium meriti manes quàm insolenter derisisti? Cui, præterquam quòd petulantissimis verbis obrectas, verbera etiam (ô impudentiam hominis omnium qui viuunt!) tanquam puero tertiae classis Corbachianæ minitaris.

Non te huius, vt cætera mittam, pudet Scriboni? Puderet, nisi frontem perfricuis-
ses. Quid verò doctos de te iudicare censes? Adeone decorum tibi videtur, vt mortuo leoni insultans pro lepore, & cum mortuis luctans pro larua habearis?

*Egregiam verò laudem & spolia ampla re-
portas:*

sed talia, quæ nemo sanus sibi tecum volet esse communia.

Ego verò, ne forte id putes, Scriboni, tantorum virorum patrocinium nequaquam suscepi, sed vitia illa tua, quæ siue impudenter, siue imprudenter, illiberaliter certè in commentando committis, ob oculos tibi ponere volui, vt pro tua in medicando dexteritate à me tibi monstratos pertinaciæ, contentionis & virulentiae morbos (intellexi enim medicos in propriis morbis cognoscendis vt plurimum hallucinari) adhibitis docilitatis, sobrietatis & modestiæ antidotis profligare satagas. Quæ si in tuis hortis (nam non omnis fert omnia tellus) vt faciliè crediderim, non nascuntur, aliunde, quemadmodum & cætera exotica, erunt comparanda. lisque vsurpatis magis sanum tibi deinceps fore cerebrum confide, quàm si ter quaterve Anticyras hellebori bibendi gratia magno sumptu nauigationem instituisse.

Quoniam verò dubito, vtrum pro hoc meo salutari consilio, quæ huius ætatis hominum erga beneficos est ingratitude, vel minimam mihi homini ignoto habiturus sis gratiam, hoc vnum te per te ipsum, quem tibi scio esse carissimum, oro & obsecro, vt hanc meam in te exornando, & ab animi vitis emaculando, fraternam sollicitudinem

nem in meliorem partem accipias. Quod si feceris, id maximæ gratitudinis loco habebō, & tantē, vt maiorem abs te expectare nec velim nec ausim.

C A P V T III.

Propositio; ubi simul narratur, quomodo Saga per aquam frigidam explorari soleant.

NVnc, quia mētem tuam in meliorem statum reductam confido, ne crabrones irriterem, qua possum æquanimitate verborumque mollicie examen illud Sagarum per aquam frigidam tecum examinare constitui.

Qua in re quanquam actum agere, ac proinde incassum laborare tibi videbor, quod & Evuichio in vestibulo Physiologiæ tuæ obiectum memini: tamen periculum faciendum censeo, si forte nunc animo saniore, hoc est ad intelligendum magis accommodato tractabilior euaseris, quàm antè, cùm alii in eandem arenam tecum descenderēt, fuisti. Atq; vt rem ab ovo vt aiunt exordiar, eius narratio ita propemodum se habet.

Cùm Lemgouiam anno 1583. mense Septembri venisses, tres Sagæ ob plurima eaque nefanda delicta iudicum sententia

ad rogam damnatae, & extra urbem concrematae sunt. Quo die id fiebat, tres aliae, quas priores illae ceu socias & factionis suae confortes indicarant, protinus à lictoribus comprehensae, & custodiae sunt mandatae. Postridie secunda circiter hora nudatae vestibus, decussatim ligatis manibus pedibusque, nimirum ut dextra manus sinistro pedi & sinistra dextro per pollices copularetur, quò ne minimùm quidem inouere se possent, spectantibus aliquoties mille hominibus, ter in aquam sunt coniectae, cui instar truncorum innatantes nequaquam visae sunt submergi.

Huius rei in aliis Germaniae locis inusitatae cum tu quoque non tam spectator quàm admirator esses, de causis eius aliquid nosse cupiens, ex aliorum relatu intellexisti, isthoc pacto suspectas veneficii mulieres probari solere. Pro Sagis autem haberi illas, quae non merguntur; quae verò merse subsidunt, innocentes declarari. Atq; illum examinandi morem in Lemgouiensi Rep. non antiquum esse, sed nouum, & proximo anno ex aliorum populorum obseruatione introductum. Hæc ferè in epistola. In Physiologia autem nuper edita scribis, illam ligationem, quae fit decussatim, quòd ob crucis fi-

cis figuram superstitionem redoleat, aliis in locis negligi, ibiq; satis esse, si manibus duntaxat vinctis in aquam præcipitentur.

C A P V T III.

Quòd modus ille Sagas per aquam frigidam explorandi, superstitiosus & Diabolicus sit, ac proinde incertus & fallax.

QVæ hæcenus veluti ex ore tuo commemorauimus, omnia ita gesta esse indubitâter credimus. Quòd verò inde colligis experientiam illam, hoc est, illum Sagas explorandi modum certum nec fallacem esse, nequaquam tibi dandum existimamus. Etsi enim tam vetus est, vt origo eius ignoretur, haud dubium tamen, quin à superstitione potius, quàm quauis alia occasione originem duxerit. Diuinitus vtique reuelatum aut præceptum esse, nullis testimoniis ex sacris literis tanquam vnico veritatis fonte petitis (nam friuolasillas tuas coniecturas ne gry quidem facio) vnquam mihi confirmabis. Neque verisimile est casum illa ostendisse, quæ cum tanto fiunt apparatu, quantus ad hoc examen requiritur. Multo minùs humana ratio aliud ex alio colligens ex causis physicis eo modo Sagas

explorare docuit. Nam cùm tu in rei, quam iam oculis tuis vidisti, causis indagandis tantopere te fatiges, & quò magis progredieris, tantò magis exorbites, nouisque subinde contradictionibus & absurditatibus te implices: quomodo superiorum ætatum homines ex causis naturalibus, rem, quæ omnes physicæ scientiæ terminos excedit, ab eaque longè alienissima est, humano iudicio & consilio introduxisse nobis persuadebis? Si ergo hæc Sagarum per aquam frigidam *δοκιμασία* Deum autorem non habet, si nec casu quodam, nec humana ratione inuecta est, quid aliud restat, quàm id, quod in principio posui, à superstitione profectam esse?

Haud immeritò etiam ob ineptos ritus, qui adhibentur, superstitionis plenissima existimabitur. Sagæ examini illi subiiciendæ nudantur, crucis in modum manibus pedibusq; vinciuntur, ter in aquam demittuntur. Cur nudæ? Cur ita vincitæ? Cur ter demittuntur? An non hæ ridiculæ & sine ratione excogitatæ sunt ceremoniæ? Nec minuit superstitionem, quòd nonnullis in locis illa in crucis figuram facta ligatio non obseruatur. Parte enim sublata non illico totum tolli necesse est? Exemplum fraudis
Diabo-

Diabolicæ ea in re apparet singulare ; qui, cum videret ceremonioso illo ligandi ritu quorundam animos tantopere offendi, vt totam actionem superstitionis exinde suspectam haberent, παρέργον decedere maluit, quàm ipsum ἔργον in totum aboleri & intermitteri. Quæ cum ita sint, cum, inquam, tota hæc actio non alio fundamento, quàm anili quadam & futili superstitione nitatur, acetum in pectore non habet, quisquis vel micam certitudinis in ea quærere instituit.

Deniq; si ex effectu de causâ iudicandum est, quid quæso hoc examinandi ritu erit fallacius? Diabolum peculiari quodam modo Sagas in aquæ superficie retinere, in Physiologia tua aliquoties fateris. Atqui hunc Christus homicidam fuisse ab initio, & in veritate non perstitisse, Ioh. 8. testatur. Addit etiam, veritatem in eo nō esse, & cum mendacium loquitur, ex propriis loqui, quia mendax est & mendacii pater. Hunc verò tu magistratui ad veritatem eliciendam operam dare cuiquam persuadere conaris? O miseros & fraudum Diabolicarum ignaros, quotquot talibus præstigiis illudi sibi abs te patiuntur!

Nec est quòd hîc mihi obiicias, Deum iustū esse: velle, vt scelerati & impii homines

notentur & puniantur: vti Diabolo tanquam ministro qui eos discruciet. Quæ verissima sunt, Scriboni, nec à quoquam Christiano homine in dubium vocantur; verum tamen distinctione opus habent. Etenim nec omnes, quos in hac vita Diabolus cruciat, impii sunt: nec pii, quibus ille vel nihil, vel parum molestus est. **DEVS** enim Opt. Max. etiam amicos suos Diabolo castigandos tradit, idq; in eum finem, vt eorum partim constantiam & fidem probet, partim superbiam, luxuriam, aliaque vitia retundat. Hi tamen ad extremum Christi auxilio superiores euadunt, & de hoste victo ferio triumphant. Impii verò, etsi foris quietissimam & nullis aduersæ fortunæ procellis obnoxiam vitam agere videantur: conscientia tamen crudelissimo verme nocte dieq; sine intermissione roduntur: quidam etiam planè securi viuunt, & corporis simul, & animi ægritudinem nullam sentiunt, palàm beati, si beatus impiorum

Ante obitum quisquam supremaq; funera debet.

Nec desunt ex illorum numero, quibus in hac etiam vita omnia eueniunt aduersissima: omnes tamen æternis poenis referuantur, Hi igitur vt puniantur. Deum adiutissimi

stissimi iudicii sui executionem Diabolorum tanquam licitorum, adde etiam, si libet, carnificum, ministerio uti, Scriptura passim testatur, idque nos libentissimè credimus.

Frustra autem hinc efficere conaris, Diabolum homines sceleratos certis indiciis magistratui indicare, ut ab insontibus fontes discernere valeat, & hos supplicio afficiat, illos liberos dimittat. Nullo enim Scripturæ apice id mandatum exprimitur. Tum magistratui, qui fontes sint, qui insontes, manifestare, esset veritati testimonium perhibere, quod à Diaboli naturâ tam alienum est, quàm quod alienissimum. Quin imò cùm Christus luculenter doceat, Diabolum esse mendacii patrem, ipsumque ex sese nihil nisi mendacia loqui: absurdissimum est, ne quid gravius dicam, veritatis notas ab ipso petere & expectare. Id enim perinde esset ac si quis in lutosissima palude riuos aquæ limpidae, in plùs quàm Cimmeriis tenebris lucem meridiana clariorem quæreret.

Quò sis confugiturus, satis scio. Diabolum à Deo coactum isthuc officii iudicibus præstare dices. Dices quidem, sed non probabis. Quod si feceris (facies autem nun-

quam) libenter acquiescemus, nec litē vllam tibi deinceps intentabimus.

Cū igitur ex iam dictis constet, consuetudinem illam Sagas per aquam frigidam explorandi supersticiosam & Diabolicam esse; Diabolum autem ab initio homicidam & mendacii autorem Christus ipsemet appellet: heu miseras foeminas, quibus examen tam periculosum & fallax subeundum est: miseriores, quorum suffragiis talia approbantur: miserrimum Guilhelmum Adolphum Scribonium, qui ingenium suum tam impiis nugis defendendis prostituit.

C A P V T V.

Causæ inuestigantur, cur Sagæ in aquas proiectæ non mergantur. Vbi Contradictio: Sagas secundum Scribonium esse homines, & non esse.

Postquam quid Lemgouie videris, enarraſti, cogitare te ais cœpiſſe, an phyſica aliqua cauſa huius præſertim rei, quæ humano conſilio atq; iudicio introducta fuiſſet, inueniri & deſcribi poſſet. Et paucis interpoſitis, fateri te ais, & negare non poſſe, quin illa res ſtupenda ſit & plurimū admiranda: non tamen eiſmodi actionem eſſe

esse putas, quam mente nostra haud comprehendere queamus.

Fundamentum autem disputationis tuę in duobus illis physicorum axiomatibus collocas, quorum vnum est, Leuia suapte natura ferri sursum; alterum, Grauia suapte natura ferri deorsum. Quę nos quoque pro certissimis & infallibilibus agnoscimus. Hinc inferis, quia Sagę secus quàm alię mulieres, super aquas ferantur nec submergantur, leuitatem illis necessario adscribendam esse, à qua videlicet effectus ille producat. Cùm verò præsentiſceres, obiici tibi posse, eandem esse materiam & formam corporis Sagarum, quę sit aliarum foeminarum, & proinde parem vtriusq; leuitatem & grauitatem inesse oportere: aliud principium ad propositum tuum constabiliendum assumendum tibi iudicasti.

Dicis itaque, veneficas (tua verba quantum possum retineo) prioris suę formę statum eo ipso tempore protinus amisisse, ex quo necessitudinem cum Satana & familiaritatem inierunt, nec amplius esse tales homines, quo ad formam interiorem, quales antè fuerunt: adeoque nouam prorsus formam assumere. Itaque Sagas definis homines, essentiam Diaboli, à quo obsidentur, participantes.

Hic rectè ab Evvichio contradictionis crimen tibi exprobratur, à quo te liberare, licet mille tropos, mille metonymias comminiscaris, nunquam sanè poteris. Fateris in Physiologia tua, posita forma formatum poni, & sublata forma tolli formatum. Rectè sanè. Nam res per formam est id quod est, & formæ beneficio à cæteris rebus quibuscunque discernitur.

Fateris etiam in Triumpho tuo logico in formæ explicatione, formam duplicem esse, aliam interiorem, aliam exteriorem. Interior est (inquis) substantialis rerum invisibilis forma, quam paulò antè essentialem appellaueras. Exterior est cuiuslibet rei exterior facies siue figura; eamque formæ distributionem à Petro Ramo prætermissem doles.

Ex quibus ego colligo, te Sagas homines esse simul fateri & negare, hoc est, te ipsum contradictione implicare. Homines esse fateris; quoniam hoc nomine abs te appellantur. Contrà negas esse: quia interiorem illam formam, videlicet essentialem, eas amisisse affirmas. Etenim sublata essentiali hominis forma, ipsum formatum quoque, hoc est, hominem tolli necesse est. Audi igitur syllogismum.

Quis-

Quisquis hominis interiorē, hoc est, essentialē formā amisit, homo amplius non est.

Sagæ (ex tuo ore loquor) interiorē, hoc est, essentialē hominis formā amiserunt.

Ergo Sagæ homines amplius non sunt.

Sagæ igitur homines tibi sunt, & non sunt.

Quid autem est in Logica arte, de cuius peritia tantopere gloriaris, impingere; quid tibi ipsi contradicere, si hoc non est? Verum id iudicii tui, quod à deploratis illis mulierculis (penè quid grauius mihi excidisset) fascinatum opinamur, grauiissimis perturbationibus acceptum feremus. Tu verò Logicæ artis Magister, & toties triumphator, tum etiam excellentissimus Rhetor tam leuem contradictionem coloribus rhetoricis facilè velare, & rerum imperitis, vt ne minimum quidem dissensionis animaduertant, citra difficultatem fucum facere poteris?

Ex hac fiducia tuus ille ad Evvichium sermo prodit: *Tu quidem opinaris me formam hominis interiorē, siue substantialē è Sagis excludere. Vnde verò hoc colligis? Ex verbis, puto, minùs dextrè intellectis.* Heus tu, Scriboni, mortuo verba facis, qui nec exaudire

te, nec responsum tibi dare potest. Pro quo ego (modò cum gratia & pace tua fiat) paucis tibi respondebo, nimirum ex verbis tuis non perperam aut minùs dextrè, sed propriiſſimo ſenſu acceptis, id tam euidenter colligi, vt mirum candidioribus videatur, qua fronte negare audeas.

An non ſatis clarè fabularis, Sagas prioris formæ ſtatum amiſſiſſe: clariùs autem, priſtinam formam amiſſiſſe: clariffimè, non amplius eſſe tales homines, quò ad formam interiorem, quales antè fuerunt? Idem igitur tibi ſignificant hæc tria: prioris forma ſtatus, priſtina forma, & forma interior: licet diuerſum ſonent. Significant, inquam, formā hominis eſſentialem. Hanc enim tu interiorem vocas. Atque his ſubiungis, eas nouam formam aſſumere. Vnde iterum ſequitur, priorem periſſe. At qualem? interiorem nempe. Huic enim abſte opponitur.

Quid igitur tergiuerſaris, Scriboni? Quin agnoſcis tuam antilogiam? Proteum age, quantum libet. Mihi clariùs hiſce nihil dici poſſe videtur. Ergo hæſitantem lectorem ad epiſtolæ tuæ verba remitto.

CAPVT VI.

Fallitur Scribonius, quòd Sagas à Diabolo obsideri opinatur.

PORRò quòd in definitione Sagarum asseris, Sagas Diaboli, à quo obsidentur, essentiam participare; Diabolum item corda earum, & partes earum vniuersas ita occupare, vt totus per totam illarum essentiam, essentiæque partes singulas essentialiter sit diffusus, vt tantisper dum poenitentiam veram haud egerint, & omnino resipuerint (agnosce tua verba) non possit ab vlla corporis illarum parte abesse: non minùs falsum est, quàm abominabile.

Ex hac tua opinione, quot Sagæ nobis sunt præstò, totidem adsunt & Diaboli. Ergo maritus vxorem habens Sagam, cibum capturus cum Diabolo discumbit: in eodem lecto Diabolum iuxta se cubantem habet: quodque omnium grauissimum, è corpore vxoris Diaboli (vt tu vis) essentiam participantis prolem suscipit. An non hæc detestanda sunt, & dictu simul & auditu horrenda consecretaria?

Ego verò Diabolum, quò ad essentiam suam, in Sagis nequaquam habitare existimo, sed extra ipsarum corpora esse firmiter

concludo. Etenim quos obsidet, eos atrocissimè cruciat, eorum lingua pro suo arbitratu vtitur: quod Sagæ non, vt illi, experiuntur. Narrant ipsæ, quo tempore, quo loco, qua specie ad se venerit, quid fecerit, quando recesserit. Diaboli etiam phantasma semper extra se vident. Quæ vtique non euenirent, si essentialiter (vt tuis phrasibus vtar) per singulas ipsarum essentiaë partes esset diffusus.

Consule historiam Euangelicam, & verè disces, obsessos Diabolum in suis corporibus habuisse. Marcus cap. i. Erat (inquit) in synagoga eorum quidam, in quo erat spiritus impurus. & cap. 5. Egresso Christo è nauigio, statim occurrit homo, in quo erat spiritus impurus. & cap. 9. Quidam adduxit ad Christum filium suum habentem spiritum mutum, videlicet intra corpus suum. Nam esse in aliquo spiritum impurum, & habere spiritum impurum, promiscuè ab Euangelistis vsurpantur. Et nisi Diaboli dæmoniacorum corpora essentialiter obsedissent, frustra ad Christum vt expellerentur, fuissent adducti, frustra expulsi, frustra ne denuò ingrederentur, prohibiti.

At quorsum hæc, inquires, abs te allegantur? Vt intelligas, eos, extra quos Diabolus est,

lus est, non obsideri. Quod huiusmodi syllogismo demonstro:

Extra quos Diabolus est, illi à Diabolo non obsidentur.

Extra Sagar Diabolus est.

Ergo Sage à Diabolo non obsidentur.

Veriùs igitur mentes Sagarum occupat, dum prauas cogitationes & suam malitiam eis instillat, easq; ad lædendum non solùm Deum, verùm etiam proximum nocte dieque instigat. Ad quam rem nulla essentia suæ per corpora Sagarum diffusionem opus habet.

C A P V T VII.

Malè à Scribonio affirmatur, malum genium spiritualis, ætheria, æria naturæ esse. Vbi noua contradictio.

Pergis in epistola: *Quæ cùm ita se habeant, nemo utique dubitauerit, quin & totius corporis ipsarum facultates & potentia prorsus immutata sint, ac pristina earum forma perierit. Mali autem genij natura planè spiritualis est, ætheria, siue etiam, si placet, æria, leuissima, in omnem locum sublunarem celerrimè permeabilis.*

Haftenus tua verba, quibus non solùm in Theologia, verùm etiam in Physica sci-

entia turpissimè impingis. Namque spiritus & corpora ab vtriusque professoribus tanquā res maximè diuersæ, accuratissimè distinguuntur. Eas verò tu intolerabili errore hoc loco confundis. Quanto plus iudicii acumine valuisti, cū rerum naturalium doctrinam methodicam in lucem ederes. In qua naturas distribuisti in formatas & materiatas. Formatas appellas simplicissimas illas, quæ per se solius formæ proprietate absque corpore consistunt. Huius generis dicis esse mentes seu spiritus. In quorum classe malos genios etiam recenseres. Materiatas deinde naturas definis essentias in corpore motui obnoxio subsistētes; quæ nos vno vocabulo corpora nuncupamus. Has naturas postquam in simplices & concretas primò, deinde simplices in constantes & inconstantes diuifisti: cœlum, hoc est, æthera in constantium classe reponis, aërem verò inter inconstantes refers.

Diabolo igitur pro spiritibus habes, quatenus naturæ sunt spiritualis; & pro corporibus, quatenus sunt naturæ ætheriæ seu aëriæ. Et ne me in vocibus ludere putes, animum aduerte. Non dubito, quin eodem sensu Diabolis naturam ætheriam siue aëriam attribueris, quo spirituales attribuisti.

Atqui

Atqui naturæ spiritualis esse, significat tibi spiritum esse. Ergo naturæ ætheriæ vel aëriæ esse, significat corpus esse. Siquidem æther & aër abs temetipso, vt supra planum fecimus, in corporum censum rediguntur.

Cùm itaque Diaboli spiritus & corpora simul à te statuantur, fieri non potest, quin denuò durissimæ contradictionis laqueo te irretieris. Perinde enim est, ac si dixisses, Diabolus spiritus est, & non est; corpus est, & non est. Ex qua tamen tu, qui quouis cothurno versatilior es, quemadmodum & ex cæteris, exiguo negotio te explicabis.

Nos interim Diabolum spiritum eumq; malum & impurum tantisper existimabimus, quoad tu nobis corporeum esse ostendas. Aetheriæ mihi crede naturæ nihil habet, multoque minùs aëriæ. Aether visu, aër tactu, si feriat, percipitur. Neutrum horum in spirituales naturas cadit. Proinde Christus quoque, vt corpore suo apparens spiritum se non esse discipulis suis demonstraret, videndum & palpandum se præbuit; quasi diceret, quisquis videri & palpari potest, spiritus non est. Quòd verò spiritus videntur, quòd tanguntur aliquando, præter naturam ipsorum fit, & ex accidenti. Vel enim tunc aliena corpora assumunt, vel

spectra rerum, seu imagines pro rebus ipsis oculis nostris subiiciunt. Sed quid ego frustra has rationes mecum deputo, cum tu quoque in epistola tua Diabolos tanquam spiritus aspectabiles & tractabiles esse neges?

C A P V T VIII.

Diabolus, cum spiritus sit, nec levis, nec grauis est, sicut Scribonius leuissimum existimat. Leuitas enim & grauitas corporum, non spirituum sunt qualitates.

QUamobrem cum certum sit, Diabolos spiritus esse, malè leuitatem, quæ solis corporibus natura sua conuenit, eis attribuis. Hic tuam ipsius Physicam euolue, & leuitatem inter qualitates corporum, siue, vt tu vocas, naturarum materiatarum reperies. Sic autem abs te definitur: *Leuitas est qualitas à calore orta, omnia sursum euehens.* Quod si ita est; vbi calor nullus, ibi nec leuitas. At nullus in Diabolo calor; ergo nec leuitas. Præterea quicquid leue est, semper sursum nititur. Diabolus nō semper nititur sursum. Etenim in omnes mundi huius inferioris partes, sursum, deorsum, antrorsum, retrorsum, dextrorsum, sinistrorsum, & quocunq; deniq; vult, motu voluntario, non naturali, fer-

li, fertur. Ergo Diabolus levis non est. Item, Quicquid corpus non est, non potest esse leue. Diabolus corpus non est. Ergo non potest esse levis. Hic assumptionis negatio neminem offendat, cum respectu propositionis affirmet. Perinde enim est, ac si sic dixissem: Nullus spiritus levis est. Diabolus est spiritus. Diabolus ergo levis non est.

Nec valet argumentum: Diaboli graues non sunt. Igitur sunt leues. Aduersa enim de eodem subiecto simul dici nequeunt. Atqui Diabolum nec grauitatis nec leuitatis subiectum esse, supra abundè probatum est. Ergo haud necesse est, negata in Diabolis grauitate, illico leuitatem affirmari.

Nec pro te facit, quòd Diabolus Sagarum corpora in altum euehere, & celerrimè aliò transferre potest. Id enim peculiaris roboris seu facultatis argumentum est, non leuitatis. Et longè alia Diabolorum celeritas est, quàm corporearum naturarum.

Quod si ita nugari liceat, ego contrà Diabolis grauitatem inesse ostendam. Ex cœlo in infernum deturbati sunt. Qui motus est ex superiore loco in inferiorem. Iam verò eo motu graues naturæ feruntur. Et Diaboli porcos, quos permittente Christo ingrediebantur, deorsum, videlicet in mare, præ-

cipitabant. Quin etiam experti sunt nonnulli, se à spiritus insidentis vel incumbentis pondere grauissimè premi. Quæ sanè omnia grauitatis cuiusdam testimonia essent, si spiritualis natura grauitatis capax esset.

Sin verò, vt video te sub Rhetoricarum figurarum laruis, tanquam tutissimo propugnaculo, libenter latere, Diabolum idè leuissimum dicere libet, quòd in obedientia & fide erga Deum non perstitit, quòd superbiendo se & suæ factionis innumeros socios summo illo bono, Dei bonorumque angelorum consuetudine, leuissima de causa priuauit, haud grauatim tibi assentiar.

C A P V T IX.

Quòd Diabolus essentia suæ per Sagarum corpora diffusionem suam eis leuitatem nequaquam inferat.

CVM itaque ex iam dictis luce meridiana clariùs appareat, Diabolū propriè loquendo nec leuitatis nec grauitatis participem esse: audiamus, quid porrò hinc efficere volueris, si obtinuisses. *Quapropter*, inquis, *putauerim ipsam* (hoc est, mali genii naturam spiritualem, ætheriam, aëriam, leuissimam)

simam) in Sagarum corporibus residentem sua
 essentia spiritali atque volatili siue leuissima,
 longissimè etiam leuiora illa reddere, quamuis
 hoc ab alijs non deprehendatur: vel potius ita at-
 trahere spiritu suo essentialiter ipsis infuso ac in-
 herente, ut per eius leuitatem sustentatæ nolen-
 tes volentes sub aquas ferri non possint.

Video te hoc primùm velle, Scriboni:
 Quoniam leuis est Diaboli essentia, in Saga-
 rum corporibus habitans, ipsis quoque Sa-
 garum corporibus leuitatem (alijs tamen
 hominibus nō obseruantibus) ab illa com-
 municari. Ergo, Si Sagarū corpora ob Dia-
 bolum inhærentem leuia euaserunt, non
 amplius utique erunt grauia. Et quia grauia
 amplius non sunt, sub aquas descendere &
 submergi nequeunt. Hæc tuæ disputationis
 summa est.

Ad hæc ut paucis respondeam, an non su-
 præ satis clarè ostensum est Diabolum nec
 leuem esse, nec Sagarum corpora ita occu-
 pare, ut substantialiter eis insit? Quod si ita
 se habet, quomodo leuitatem suam, quem-
 admodum tu vis, cum eis communicabit?
 facietque ut corpora, quæ grauia olim fue-
 runt, in postremum existant leuia? Funda-
 mento utique euerso, quicquid superstru-
 ctum est, corruere oportet.

Tum

Tum etiam, si graua non sunt Sagarum corpora, quid opus habent hircis, scopis, alijsve eius generis vehiculis, quibus insidentes per aërem moueantur? Cur alii homines pristinam in eis grauitatem deprehendunt? Cur ex alto cadentes terræ non minùs,quàm alii homines, illiduntur?

Demus autem Scribonio,diabolum esse leuem,in Sagis etiam essentialiter commorari. Quid tum postea? Num idcirco expulsa grauitate suam eis infundet leuitatem? Exemplarepugnant.Etenim Marc.9. scriptum legimus,puerū lunaticū à diabolo,à quo obsidebatur, modò in ignem, modò in aquā, vt eum perderet, esse proiectum. Id verò quomodo fieri potuisset, si corpus obsessi leuitatem obsidentis participans graue amplius non fuisset? Quid verò de porcis Gergesenorum, de quibus Matt. & Luc.8. Marc. 5. dicam? in quos simulac præcipiente Christo dæmones irruissent, totus grex in mare se præcipitauit, & suffocatus est. Cur horum corpora, in quibus diaboli, Euangelistis testibus,verissimè erant, non itidem, vt tu de Sagis nugaris,euaferunt leuia,& aquis, vt illa, innatarunt? Quod utique factum oportuisset, si diabolus corpora illa, in quibus essentialiter inhabitat, leuitate aliqua diabo-

diabolica imbueret. Vides illa etiam arma, quæ tu in Physiologia ad delirii tui defensionem ex Euangelistis deprompseras, minimè tibi profuisse, imò plus ad euertendum quàm roborandum habere momenti. Proh pudor : capra contra seipsam cornua produxit.

C A P V T. X.

Quòd Diabolica leuitate Sagæ in aquæ superficie non sustententur.

ALiam deinde supernatationis illius causam affers. *Diabolum suo spiritu essentialiter Sagis infuso ac inhaerente ita eas attrahere, vt per eius leuitatem sustentatæ nolentes volentes sub aquas ferri nequeant.* Horum verborum, si rectè ineptias tuas intelligo, hic est sensus. Sagarum corpora, etsi grauitatem suam non deponunt, vt in priore commento somniaſti (ô inconstantiam) nihilominus tamen diabolica leuitate sustentata mergi non posse. Ad eum, opinor, modum, qua natatorum corpora suppresso spiritu in aquæ superficie retinentur. Hæc aliquatenus me puto intelligere: at vero, quid sit spiritus diaboli, quomodo item diabolus Sagas illo suo spiritu attrahat, id verò est, quod meum captum superat & Delionata.

fore opus habet. Diabolum ego spiritum
 alium non arbitror habere, quàm seipsum.
 Nec video, quomodo corpora Sagarum,
 quarum etiam partes minutissimas ex tua
 sententia occupauit, attrahere amplius pos-
 sit. De leuitate diabolica quod affers leue est,
 & responsione non indiget, ne crambe to-
 ties cocta lectoribus nauseam moueat. Sa-
 tis demonstratum est, à spirituum natura
 corporeas qualitates esse alienas.

C A P V T . X I .

*Quòd ineptissimum sit commentum, aquam
 Sagas odisse, ideò respuere, nec intra se reci-
 pere, quòd, cum eius lauacro Ecclesie Dei pri-
 mum inserta essent, eo tamen spreto à Deo ad
 Diabolum defecerint. Concluditur itaq, ne
 hanc quidem supernatationis Sagarum cau-
 sam veram existimari debere.*

NVnc ad asyli illius tui, in quod priori-
 bus duabus stationibus turpissimè de-
 fertis postremo loco confugis, expugnatio-
 nem me accingo. Cuius firmitas si par esset
 fiduciae tuae, ego frustra ad oppugnandum
 arietes meos admouerem. Verùm audia-
 mus teipsum noui huius diuerticuli omnes
 recessus à basi ad coronidem vsq; nobis ex-
 plicantem.

Sed

Sed videndum, inquis, deinceps utrúmne in ipsis fluminibus aut aquis ratio aliqua inueniri possit. Et quidni? Natura. n. non prohibet. Quid igitur dicemus? Quam causam annotabimus, quòd Sagæ aquis non submergantur? Utrúmne singularem quandam seu specialem corporis aquarum & Sagarum antipathiam? Maximè quidem. Aqua scilicet Sagas in se ferre non potest. Quomodo verò, & quam ob causam? Nempe Deus Opt. Max. suo prudentissimo & iustissimo iudicio ab omnibus inde seculis elementum aquæ prædestinauit saluari regenerationis hominum lauacro, ut qui à peccatis abluendi essent, & Christi Ecclesie initiandi, huius baptismate uterentur, & per hoc medium noui homines facti quasi per ianuam in regnum Christi ingrederentur, qui prius reiecti fueramus. Quandoquidem, inquam, Vatiniano quodam odio eas auersatur & reiicit, ut si maximè pro viribus tentent, non tamen submergi possint. Et quodnam est illud odium? Aquæ Deo placuerunt, quibus usurpatis peccata hominum ablueret atq; purgaret. In baptismate Christo Dei Filio nomina nostra primùm damus, & eius albo incorporamur, adeoq; in ciuitatem Dei ut germani ciues recipimur: ideoq; omnes qui salui modò fieri volunt, sacro huic baptismati immergi & purgari oportet. At Sagæ spreto isto diuino

lauacro, toti trinitati, Deo Patri, Filio, & Spiritui sancto scientes volentes renunciant: & nihili Dei creatoris opera, nihil ordinationes & creaturas facientes, peccatores & apostata omnium aliorum fiunt pessimi. Cum autem hoc scelere in toto mundo nullum scelestius, nullum deterius, nullum abominabilius unquam definiri aut reperiri possit: quid dubitem dicere, si Sagar non submergantur aquis, id fieri ob peculiarem istam antipathiam: videlicet quod elementum aquae nolit illas intra alueum suum recipere, sed omnino respuat, & omnibus modis fugiat, hunc scilicet in finem, ut peccatrices eiusmodi manifestentur. Nā & creaturae inanimatae inseruiunt praedicationi & gloriae nominis diuini. Vt scilicet caeli, ita quoque elementa enarrant gloriam Dei, tum aliās, tum in hoc, si peccatum & iniustitia ab illis reuelata puniatur. Aqua in baptismo est sacramentum, est signum, est sigillum initi inter Deum & hominem baptisatum noui fœderis. Quidni igitur eadem alio modo signum aut indicium esse possit dissoluti illius & fracti iterum fœderis? Et hanc rationem siue causam facilius dixerim esse verissimam, ut si aliae nullae admittenda videantur, una tamen haec recipienda sit.

Quàm verum est, Scriboni, quod vulgò perhibent, ægrum animum semper errare.

Con-

Constitueras nobis supernatationis Sagarum causas physicas explicare. Nunc ad Baptismum confugis. Vbi de hoc in physicis traditur? Annō hoc potius est ex metaphysica rationes petere? Grauiissimè, quod doleo, hoc loco Theologos offendisti. Vindex hominum genus, si quid contra Scripturam delinquas. Baptismum abs te euacuari conueruntur. Quamobrem, inquires? Quoniam regenerandi & à peccatis purgandi virtutem aquæ ascribis, nulla interim Spiritus sancti, qui regenerat, & sanguis Christi, qui à peccatis mundat, facta mentione. Confers igitur in Creaturam, quod Creatoris est: in signum, quod rei signatæ est. Quod non sine magna vtriusque fit iniuria.

In mentem tibi veniant exempla eorum, qui, antequam baptizarentur, iam erant regenerati. In quorum numero sunt Aethiops & Cornelius Centurio. Sic Abraham antequam circumcideretur (in circumcisionis autem locum à Christo baptismus est substitutus) iustificatus erat. Ex quo efficitur, nō aquam, sed præstantiorem aliquem regenerationis autorem quærendum esse, nimirum Spiritum sanctum. Pari ratione cum sanguinem Iesu Christi filii Dei ab omni peccato nos purgare i. Ioh. i. Christum

lauisse nos à peccatis nostris sanguine suo; Apoc. i. nos redemptos esse pretioso sanguine Christi tanquam agni immaculati i. Pet. i. à Spiritu sancto docemur; cogitemus hanc vim nulli alii creaturæ inesse, ac proinde nec aquæ.

Quorsum igitur, inquires, aquæ in Baptismo ex Christi instituto adhibetur? Respondeo; ab externa illa corporis abstersione, quæ fit per aquam, internam illam, qua sanguine Christi pro nobis effuso à peccatis mundamur, nobis obsignari. Quam certò igitur aqua baptizati sumus, tam certò credamus, nos per Christi sanguinem remissionem peccatorum obtinuisse. Præter hæc immersio in aquam adumbrat nobis veteris hominis mortificationem; emerisio ex aqua regenerationem & nouam vitam. Vides igitur aliud officium, alium usum aquæ esse in baptismo, quàm tu Scriboni opinaris.

Verum enim uerò, ut magna errorum foecunditas est, ex eo, quòd aqua nos regenerari & à peccatis purgari scribis, natus est alius, nimirum, eos, qui sine baptismo decedunt, æternæ salutis participes fieri non posse. Atque is error tertium nobis in Ecclesia peperit, quo baptizandi facultas priuatis hominibus ipsisq; adeò mulierculis conceditur,

tūr, ne infantes recens nati, si subita aliqua
 eaq; periculosa ægritudine corripiantur, &
 legitimi ministri copia non sit, sine bapti-
 smo spiritum exhalent.

Atqui Deus infantes fidelium, antequam
 nascantur, se adoptare in suos pronunciat,
 quum nobis se Deum fore promittit & se-
 mini nostro. Quibus verbis infantium salus
 absque dubio continetur. Non igitur pu-
 tandum est, infantes, qui absque baptismo
 moriuntur, regenerationis gratia & æterna
 salute priuari. Neque verò ita, vti diximus
 cum piis sentientes Baptismi dignitati quic-
 quam derogatum volumus, sed infantes
 primo quoque tempore Ecclesiæ Dei per
 Baptismum inserendos iudicamus. Quod si
 per supinam & impiam parentum oscitan-
 tiam negligatur, id parentibus potius ipsis,
 quorum negligentiam Deus non sinet im-
 punitam, quàm infantium saluti officere
 certissimè persuasum habemus. Ast hæc in
 Theologorum libris fusiùs exponuntur.

Cernis igitur, Scriboni, duorum crimi-
 num à venerandis Theologis te accusari:
 quorum alterum est, quod regenerationem
 nostram, & à peccatis purgationem, non à
 sanguine Christi, & Spiritu sancto, sed ab ex-
 terno elemento, aqua videlicet, dependere

autumas: alterum verò, quòd omnibus illis, quibus aqua aspergi non contingit, salutis & æternæ vitæ hæreditatem denegari putas.

Proximum est vt videamus, quid porrò velis. In Baptismo dicis nomina nostra Christo nos dedisse, & albo eius incorporatos esse. Quoniam verò Sagæ spreto isto lavacro toti Trinitati, Patri, Filio & Spiritui sancto volentes renunciarint: idcirco aquam, per quam lauacrum illud perficitur, Sagas odio (quod tu lepidè admodum Vatinianum vocas) prosequi, & intra alueum suum recipere nolle, sed omnino respuere: atque ob hanc causam ipsas in aquam præcipitatas mergi non posse, quò magistratui manifestentur.

Vno absurdo posito infinita alia sequuntur. Aquæ regenerandi & à peccatis mundandi virtutem falsò attribuisti. Nunc iniuriam contempti Baptismi in eandem redundare affirmas, ac proinde ab aqua Sagas odio haberi ac reiici, vt si maximè tentent, mergi tamen nequeant. Ego hætenus credidi & adhuc credo, eos qui Baptismum contemnunt, & à Deo ad Diabolum deficiendo irritum reddunt, nulla contumelia externum symbolum, nimirum aquam, verum ipsum Deum, afficere. Quemadmodum

dum etiam Paulus testatur, illos, qui ad mensam Domini accedentes indignè de pane edunt, & de poculo bibunt, non panis aut vini, sed corporis & sanguinis Domini reos fieri, ideoque iudicium sibi edere ac bibere. Sic illi, qui Principis alicuius statuam, imaginē, sigillum, aut aliud eiusmodi malitiosè violant, non in lapidem, aurum, argentum, unde facta sunt, sed in ipsum Principem delinquant, & iniurii sunt.

Iam verò illud etiam perquam ridiculum est, quod ob Baptisimum spretum ab aqua Sagas odio haberi scribis. Ergo aqua viuit? Ergo sentit? ergo ratione prædita est aut certè aliquid, quod rationi analogum sit, habet? Quæ utique absurda sunt. Nam odium ex offensa nascitur. Quomodo autem offendi potest, qui molestiam nullam sentit? Si ergo molestiam non sentit aqua, nec offendetur: Et si non offenditur, nec odio habebit. Vt ego opinor, aqua est res muta, cæca, surda, vniuersis denique animæ facultatibus in totum destituta: nec te in tua physica aliter sentire video: licet hîc animatam facias, dum velle & nolle ei attribuis.

Ad innatas rerum antipathias, quales multę sunt, confugies, easq; similibus phrasibus enunciari dices: Sic Magnes vna parte

trahit ferrum , altera respuit : vna parte ad Septentrionem flectitur, altera Septentrionem auersatur. Sed hoc est rem exemplis declarare & explicare, quæ probatione adhuc indiget.

Et magna inter hæc est dissimilitudo. Quòd Magnes vna parte ferrum & Septentrionem fugit, naturalis quædam alienatio est. In aqua erga Sagas nulla talis. Igitur si qua esset, aliunde accederet. Id quod adhuc tibi demonstrandum relinquimus. Deinde Magnes vel teipso in tua Physica teste, quodammodo viuit. In aqua vitæ nihil.

Demus autem, aquam spreti Baptismi iniuriam vlisci tam posse quàm velle, an non tum potius totas protinus absorberet & suffocaret, quàm sine vllò vitæ discrimine veluti dorso suauiter subiecto retineret? Cur non ipsa potius de iis, à quibus tam grauitè scilicet læsa est, supplicium sumeret, quàm carnifici cruciandas traderet? Nisi fortè existimas, aquam instar principis cuiusdam puniendi munus, tanquam sua maiestate indignum, ad carnificem relegare. Et certè Sagarum, si submergi nequirent, in naufragio periclitantium multo melior esset conditio, quàm aliorum hominum. Si te in submersionis metu constitutum porrecta manu

manu aliquis seruaret, non tu illum amicum & in te beneficium agnosceres? Effet igitur amoris, non odii indicium, si naufragi Saga suffocationis periculo per aquam liberaretur.

Præterea si aqua Sagas tantopere auersatur, cur non minus quàm alii homines ab illa madefiunt? cur lauantur aqua? cur per medias aquas incedunt, & non potius eius superficiem, sicut Christus & Petrus fecerunt, calcant?

Cur etiam aquam bibunt, & in corporis sui nutrimentum conuertunt? Hæc meo quidem iudicio nullius antipathiæ sunt indicia, sed amicitiae potius, quoniam ex aqua & Sagarum corporibus vnum quid constituitur.

Equidem si inter aquam & Sagas aliquid antipathiæ esset, cum aqua sit corpus homogeneum, cuius partes eiusdem cum toto sunt naturæ, oporteret antipathiam hanc in minima etiam illius guttula suas vires exerere, quemadmodum cæteræ aquæ proprietates in minimis eius particulis sese manifestant.

Præterea cum Sage panem Domini contra Dominum edentes, & poculum Domini contra Dominum bibentes, non mino-

re contumelia sacram Coenam afficiant, quàm Baptismum: cur hæc duo symbola, panis & vinum, non pari etiam odio, quo aqua, Sagas prosequuntur? Par, ut mihi quidem videtur, utrobique est ratio. Videmus autem pane Sagas vesci, & vinum avidissimè bibere, adeo ut nulla hîc odii vel minimi argumenta appareant.

Et cum Baptismum irritum faciant, quotquot è Dei coetu in castra Diaboli transeunt, ut sunt Mamaluchi apud Turcas, aliiq; impii & hypocritæ impœnitentes, per Baptismum Ecclesiæ Dei visibili olim inserti, cur non aqua, tanquam suos hostes, hos etiam odit, & mergi prohibet? Ego quidem à submersione immunes nunquam audiui.

Verùm aliquid ex teipso contra teipsum audiamus. *Philarchus, inquit, refert, in insula Ponto genus quoddam esse hominum, qui prope modum omnes artem norint Magiæ illicitæ & præternaturalis; eorumq; indicium esse imaginem in altero oculo equinam, in altero autem geminæ pupillæ, qui nulla ratione sub aquis possint submergi, ut maximè pluribus etiam vestimentis aggraentur & onerentur.*

Quid audio Scriboni? Quid hos mergi vetuit? num odium aquæ? Atqui illi ethnici erant baptisinate sacro haudquaquam tincti. Ex

Ati. Ex quo efficitur, aliam supernatationis Sagarum, cum per aquam explorantur, causam esse, non indignationem aquæ ex baptismi contemptu natam.

Heu iterum proprio Scribonius occidit ense!

Cum itaque internum hostem habeas animum à seipso ut plurimum dissentientem, & extremum illud tuum refugium ab una parte Theologi, ab altera Philosophi suis machinis tam vehementer quassarint, ut tueri amplius nequeas; quid superest, quàm ut deditioem facias, herbam porrigas, & à bello hoc scholastico in posterum, quantum potes, etiam præter naturam tuam abstineas? Norunt illi

Parcere subiectis, & debellare superbos.

Penes te est, utrum expectare malis, eligere.

C A P V T XII.

Quæ vera sit cum efficiens tum finalis causa, quòd Sage in purgatione per aquam frigidam submersioni non sint obnoxia.

EX iis, quæ hætenus diximus, apparet, Sagas à Satana non ita obsideri, ut per totam ipsarum essentiam, essentiæq; partes singulas essentialiter, (quemadmodum tu loqueris) sit diffusus. Manifestum etiam est,

Diabolos leues non esse, ac proinde nulla spiritali leuitate Sagarum corpora, quæ in se grauiasunt, tam leuia posse reddere, vt in aquæ superficie librata fundum non petant. Ex quo illud etiam efficitur, Diabolum leuitatis suæ, quæ tamen nulla est, beneficio, eadem corpora pristina grauitate manente in summa aqua citra merfionem haudquaquam retinere. Postremo loco ostensum, aquam Sagis ob Baptismi despectum peculiari quodam odio infensam non esse, neque inde fieri vt à submersione sint immunes. Hæc, inquam, hætenus non minus firmiter quàm perspicuè demonstrata sunt.

Cum verò, quicquid fit, alicuius causæ vi existat: illæ verò, quæ abs te allatæ sunt, non probentur: aliam fortasse à me requires. Vt liberè dicam quod sentio, ex naturalis scientiæ fontibus nullam hauriri posse existimo, iiq̃ue, qui id tentant, inani cura ingenia sua fatigare mihi videntur. Absque impietate tamen affirmari posse censeo, Diabolum admiranda potius, quàm inquirenda facultate id, quod quæritur, præstare. Nam cui tanta vis est, vt non solum Sagas, sed alios etiam homines sæpe per aërem sublimes rapiat, quis neget, eundem Sagas in aquæ superficie, ne mergantur, posse fulcire? De quibus
te quo-

te quoque in epistola tua loquentem audi-
amus.

Argumento est, inquis, & documento, ut mihi videtur plane verisimili: quod eas sæpenumero in sublimē usq; aērē trahat, quibus pro sua alioquin corporata quam obtinent natura, eo usq; ascendere impossibile futurum sit. Quod si verò hoc imaginarium & falsum esse quis putet, utpote quod ita contingere sua tantummodo imaginatione sibi persuadeant: experientia contra argumento nitor, quæ sæpiissime testata fuit, homines etiam, quos cum malo spiritu ullam habere coniunctionem nemo unquam deprehendisset, ab eo ex una platea in alias longissimè disitas, aut sæpe quoq; ex urbe aliqua vel pago in campos siue remotiores, prius in aërem subliorem quasi capillis subuectos, violenter proiectos fuisse: ut tum alibi, tum Marpurgi aliquoties contigisse rescivi.

Simili potentia bonus angelus Prophetam Habacuc ex ludæa in Chaldæam, ut pulte sua Daniele in spelunca leonum cibaret, detulit. Adderem etiam historiam tentationis Christi in deserto, quem Evangelistæ affirmant à tentatore supra pinnae templi statutum, atque inde in montem excelsum transportatum, nisi hoc alii cum D. Cypriano in sermone de ieiunio & tenta-

tionē Christi, spiritu magis quàm corpore contigisse affirmarent. Modus, quo talia eueniunt, nobis incognitus est, neque ut cognoscatur, nostra refert. Habes igitur Scriboni, quid de causa efficiente sentiam.

Finem requiris? Is ex Diaboli ingenio æstimandus est, qui cùm natura sua sit mendax & homicida ab initio, tum etiam humani generis iuratus hostis, alium scopum non habet, quàm mendaciis omnia inuoluere, à vero Dei cultu abducere, superstitionibus hominum animos irretire, cædes innocentium spirare. In hoc autem per aquam frigidam examine hoc potissimùm quærit, ut spectatores suis præstigiis demettet: reas veneficii quandoque liberet; innocentes cōtrà carnifici discrucianas tradat. Atq; hanc meam sententiam cum religione & pietate nequaquam pugnantem non dubito, quin homines cordati & Dei & æquitatis amore accensi suis suffragiis sint approbaturi.

EPILOGVS.

VTinam, Scriboni, aut tuam Physiologiam in lucem nunquam emisisses, aut saltem à scommatibus & diçteriis, quibus Euvichium amarulenter impetis, abstinu-

stinuisses. Tum certè ego hoc molestissimo scribendi labore libenter supersedissem. Causaberis ea, quibus Evvichius perstringitur, ipso adhuc viuo abs te conscripta fuisse. Esto sanè. At certè typis impressa nondum erant, & longo post illius obitum interuallo in hominum manus peruenerunt. Tolli igitur illepidi tui sarcasmi abs te potuère, & lacunæ rebus vtilioribus expleri.

Amicè autem te moneo, vt modestiæ deinceps studeas, nisi *πρὸς αὐτὰς μέγιστον καὶ λώιον* tua conuitia tibi reddi velis. Ego sanè moderato & sobrio scribendi genere delector, non tali, quale nunc secutus sum. Sed nodo malo malus quærendus erat cuneus. Cumq; , vt Ouidius ait,

Sæpe ferat miseris succus amarus opem.

Ego quoque huic disputationi plus aloës quàm mellis admiscui. Sciebam enim, mel in calidis naturis in bilem conuerti, quo humore & insuper pituita falsa (sic enim vos loqui puto) te totum, quantus quantus es, diffluere, scripta tua perspicuè testantur. Itaque ne oleum igni adderem, mel paulò moderatius adhibui. Tuum est hunc laborem, quem tui commodi gratia suscepi, boni consulere, & ignotum patronum veritatis amicis tuis adnumerare.

AD LECTOREM.

QVoniam prodigiosè illius
Scribonianæ epistolæ in
Typographorum officii-
nis nulla amplius exempla pro-
stant, ne quis falsò & per calu-
mnia mea, quæ ab ignoto veri-
tatis patrono examinantur, al-
legare putet, visum est ipsam
Epistolam, ex Lemgouienfi ex-
emplo fidelissimè descri-
ptam, hoc loco sub-
iicere.

F I N I S.


DE EXAMINE
ET PURGATI-
ONE SAGARVM
PER AQVAM FRI-
GIDAM

EPISTOLA

*Guilielmi Adolphi Scribonii
Marpurgensis.*



clō lō LXXXIX.



P R V D E N T I S S I M I S


E T I V R I S C O N S V L T I S S I M I S

VIRIS, DOMINO HENRICO FLOREKEN,
& Domino Theodoro Cothmanno, Con-
sulibus, Scholarchis, & Consiliariis Reipub.

LEMGOVIANAE dignissimis:

fautoribus & amicis suis ob-
servandis.

Ἐν ἀρχῇ.



*Vm die vigesima quinta Septem-
bris, Prudentissimi & Doctissimi
Consules, ad vos Lemgouiam veni-
rem: biduo post die Veneris videli-
cet proximo ante ferias Michaelis, anni huius
currentis MDCCCIII. tres Saga siue
Venefica ob plurima & nefanda à se commissa
peccata, Senatusconsulto extra urbem ignis
flamma occise fuerunt; eiusdemq; diei vespere
tres aliæ protinus, quas illæ priores magistratui
ceu socias & suæ factionis consortes indicassent,
à lictoribus comprehensæ, & carceribus man-
cipatæ: sequente autem die circiter horam pome-
ridianam secundam ad explorandam rei veri-
tatem ante portas urbis in aquas proiectæ fue-
runt, ut videretur, num submersum nec ne itu-
ræ essent. Nempe pedibus manibusq; ligatæ, &*

vestibus prius exutis hac ratione vinctæ erant, ut dextri lateris manus sinistri pedis pollici, & vicissim sinistra manus dextro pedi arctè colligaretur, ut ne minimum quidem se aut corpus suum mouere possent. A carnifice deinceps in flumen, millenis aliquot hominibus aspectantibus, & singula quidem vice tertia coniectæ ei instar trunci alicuius lignei innatabant, nec vlla earum submergebatur. Et quod miretur aliquis, cum è carceribus per ciuitatem singula ad dictum examinis locum in singulis carris eueherentur, pluuiosa admodum tempestas iam ante orta, quamprimum, eo ipso ferè momento, quo Saga istæ aquas contingerent, remittebat, adeo, ut dum illis supernatarent, ex improviso Sole splendente cælum omnino esset serenum. Iis autem denuo extractis subito iterum pluere incipiebat.

Huic ego spectaculo cum interesssem, rei visæ nouitatem summopere admiratus, utpote quæ in aliis Germaniæ partibus vix audita esset: de examinis eiusmodi causis & rationibus nouisse aliquid cupiens, nihil certi rescire potui, sed dictantum intellexi ex observatione quidem nonnullorum populorum hanc præterita æstate consuetudinem introductam esse, ut si quæ sint Saga aut Venesica, vel saltem artis & societatis illarum ob antegredientem quandam reuelationem

nem suspecta, ea prædicto modo examinentur, & quæ aquis supernatent, nocentes putentur, quæ verò submergantur, libera & insontes scelerisq; pura credantur: nec tamen ullam huius iudicii sufficientem causam dari posse.

Vehementius itaq; rem indies demiratus cogitare cepi: an Physica aliqua & naturalis ratio huius præsertim rei, quæ humano consilio atque iudicio excogitata introductaq; fuisset, inueniri & describi posset. Idque eam maximè ob causam, quod vos prudentissimi & doctissimi Consules, præsentibus aliis Consularibus à me peteretis, ut quid mihi hac de re videretur, significare, & vobis descriptum communicare vellem. Fateor itaq; nec enim negare possum, rem hanc esse stupendam, & plurimum admirandam: non autem eiusmodi actionem esse puto, quam mente nostra haud comprehendere queamus. Quamobrem etiam meam qualemcunque sententiam, minus grauatè pro ingenii quod in me est tenuitate annotare volui, aliis eruditioribus occasionem præbiturus, ut illi propositam questionem caput hominis vitæ discrimen concernentem, melius meliusque perpendere & declarare studeant.

VVierus Philosophus Medicus lib. 6. de præstig. demon. cap. 7. huius consuetudinis mentionem faciens, eam nihili faciendam & ceu rem

siue indicationem saepe fallacem contemnendam esse concludit. Nullis autem, quæ videam, certis argumentis sententiam suam tueri & defendere potis est. Neque vllum quoque speciale in eo cap. proponit exemplum, quo testetur hanc Sagas cognoscendi & probandi experientiam fallacem & incertam esse. Quamobrem *VVieri* testimonio, nemo arguere poterit rei quam explicamus futilitatem & incertitudinem.

Præterea ante *VVierum* Iurisconsulti quidam veteres, id quod te in primis *Clariss.* & *Doctiss.* *Domine Cothmanne* mihi monstrante, è lectione illorum obseruavi, eiusdem rei mentionem fecerunt, sub titulo vel nomine purgationis per aquam frigidam. *Cuiac.* in com. 2. super lib. 1. de Feud. Gerh. *Nigri* hoc iudicium aqua frigida definit, indicans hoc in *Longobard.* prius usitatum, sed denuo exolutum fuisse. *Iodocus* in super *Daumhoude.* *Brugens.* in rerum crimi. praxi cap. 43. Eodem, inquit, pene tempore & alia purgationes & vulgares fuere receptæ, quibus à presumptionibus & suspicionibus diffamati & delati purgabantur. Nempe cum candens ferrum vola manus compresserant, aut cum super ignoto ferro nudis plantis incesserant hisve similia: de quibus purgandi formis multa donata sunt à principibus priuilegia *Flandriæ*. Porro

Gan-

Gandauensibus ciuibus à Comite Flandriæ indultum priuilegio fuit sese purgare aqua frigida, &c. Earundem purgationum meminit Didacus Couarruuius à Leyua Toletanus Archiepis. Hispan. lib. 4. cap. 23.

Philarchus insuper refert in insula Ponto genus quoddam esse hominum, qui propemodum omnes artem norint Magiæ illicitæ & præternaturalis: eorumq; indicium esse imaginem in altero oculo equinam, in altera autem geminæ pupille qui nulla ratione possint in aquis submergi, ut maxime pluribus etiam vestimentis aggrauentur & onerentur. E quo cognoscitur, in Ponto quoque usitatam fuisse consuetudinem purgandi Sagas per aquam frigidam. Et alij plures eandem purgationem describunt. Sed verbo tenus tamen illi definiunt potius, quam verè interpretantur, qua de causa hæc maxime purgatio adhibita sit. Nulla enim Catholica siue constans aut firma ratio additur. Equidem vero quod vidi diligentius perpendens censeo, si nec ego, nec VVierus: nihilominus tamen alios forsitan causam aliquam purgationis inuenire posse. Quod enim hominum logica intelligentiæ subiectum est: eius quoq; causa aliqua, si non omnino certa, attamen probabilis inquiri potest: qua etiam, si certa desit, mens humana acquiescere solet. Sagarum verò illud examen humano con-

filio iudicioq; introductum est. Ergo non dubium, quin certis de causis & argumentis excogitatum fuerit, ut maximè prisci illi autores ista suis descriptionibus non addiderint.

Omniū proinde Academicorum Peripateticorumq; philosophorum unanimis & concors hac sententia est, leuia ferri sursum, & superiorem quenque locum petere: graua verò deorsum ferri, & inferiore semper loco pro suapte natura gaudere. Vnde fit, ut vel maximum lignum propter raritatem essentiae, quam leuitas consequitur (omnia enim rariora sunt quoque leuiora) aquis supernatet: lapis autem, siue plumbi portio vel minima, ad fundum feratur. Ex hoc igitur fundamento physicorum propositae quaestionis sententia deducenda & concludenda videtur: quare videlicet Sagar potius, quàm aliae mulieres super aquas ferantur, nec submergantur. At qui obiecerit quispiam, opinor, protinus eandem esse & materiam, & formam corporis Sagarum, quae sit aliarum faeminarum: easdemq; qualitates à primis ortas, quoad leuitatem & grauitatem. Si igitur Sagis leuitas quaedam adscribenda sit, non minorem quoq; aliarum mulierum concedendam esse. Quamobrem aliud principium ad quaestionem nostram constabiliendam assumendum erit.

Dico itaque, Veneficas prioris suae formae statum

tum eo ipso tempore protinus amisisse, quo necessitudinem cum Satana & familiaritatem ini-
erunt, nec amplius esse tales homines, quantum
ad formam interiorem, quales ante fuerunt:
adeoq; nouam prorsus formam assumere. Sage
scilicet definiri possunt homines essentiam Dia-
boli, à quo obsidentur, participantes. Malus enim
iste genius, spiritus & rex aëris, qui causa &
origo est delictorum peccatorumq; omnium, cor-
da malarum istarum mulierum, & partes reli-
quas uniuersas ita occupauit, ut totus per totam
illarum essentiam, essentiaq; partes singulas
substantialiter sit diffusus: imo ut tantisper,
dum pœnitentiam veram haud egerint, & o-
mnino resipuerint, non possit ab ulla corporis ea-
rum parte abesse. Vnde fit, ut ubicunq; mouean-
tur, hunc secum gestent, ideoq; nihil quoque boni
amplius cogitare aut efficere, sed pessima & de-
terrima quaque scelera & flagitia perpetrare,
peccataq; enormia committere soleant, nihil ni-
si detrimentum atq; pernitiem aliarum creatu-
rarum molientes. Quamuis enim nonnunquam
bonitatem, pietatem, sanctimoniâque, nescio
quantam simulare videantur, adeo ut vel Dei
Opt. Max. mensam cum aliis accedere inter-
dum non vereantur: id quod obseruatum fuit in
quibusdam, quæ primis quoq; diebus, postquam
id fecissent, comprehense fuerunt: id fit ex in-

stinētum tantum & permissione Satanae, ut aliis hominibus ipsarum malitiam non sentientibus, eas diutius in retibus suis retinere, & magis magisque decipere possit, & ne vel ipsamet venefica omnimodam Satanae, quem amicum suum familiarem agnoscunt, malignitatem animaduvertere valeant.

Quaecum ita se habeant, nemo utique dubitauerit, quin & totius corporis ipsarum facultates & potentiae prorsus immutatae sint, ac pristina earum forma perierit. Mali autem genii natura planè spiritualis est, aetherea, siue etiam, si placeat, aërea, leuissima, in omnem locum sub-lunarem celerrimè permeabilis. Quapropter putauerim ipsam in Sagarum corporibus residentem sua essentia spirituali atque volatili siue leuissima, longissimè etiam leuiora illa reddere, quamuis hoc ab alijs non deprehendatur: vel potius ita attrahere spiritu suo ipsis essentialiter infuso ac inhaerente, ut per eius leuitatem sustentatae, nolentes volentes, sub aquas ferri non possint. Argumento est & documento, ut mihi videtur, planè verisimili: quod eas saepenumero in sublimem usque aërem trahat, quibus pro sua alioquin corporata quam obtinent natura, eo usq; ascendere impossibile futurum sit. Quod si verò hoc imaginarium & falsum esse quis patet, utpote quòd ita contingere sua tantummodo ima-

imaginatione sibi persuadeant: experientia con-
 trā argumento nitor, quæ sapissime testata fuit,
 homines etiam quos cum malo spiritu ullam ha-
 bere coniunctionem nemo unquam deprehen-
 disset, ab ea ex una platea in alias longissimè dis-
 sitas, aut sæpe quoque ex urbe aliqua vel pago in
 campos siue remotiores, prius in aërem subli-
 miorem quasi capillis subuectos, violenter proie-
 ctos fuisse: ut tum alibi, tum Marpurgi aliquo-
 ties contigisse rescui. Atqui exempla sunt
 odiosa. Verum enimvero facile obiecerit aliquis,
 si spiritali leuitati adscribendum sit, quo mi-
 nus veneficæ mulieres, quàm aliæ submergan-
 tur: purgandi tamen hanc rationem esse incer-
 tissimam & fallacissimam. Quandoquidem &
 aliæ spiritum suum ita forsā cohibere possint,
 quo facilius aquis supernatent. Quemadmo-
 dum videmus eos, qui spiritum corporis diutius
 in se retinere & cohibere valent, longinquius
 etiam & diutius natāre posse. Atqui comper-
 tum & exploratum est omnibus, natationem
 non tantum à spiritus cohibitione, sed multò
 magis proprio & validiore corporis partium
 motu effici & meliorem fieri. Cum verò Sage
 & aliæ innocentes mulieres eodem modo vinciri
 & ligari soleant: nec magis nec minus hæ quàm
 illæ & vicissim corpora sua mouere possunt. Et
 spiritus siue aër exterior, quam qui natāre so-

lent attrahunt, alijs non minus intercipitur aut excluditur quàm Sagis, & hisce contrà non magis intercipitur quàm illis. Attamen ista, quae innocentes sunt, qualemcumq; spiritum attrahant, submerguntur. Quippe experientia testis est, omnes illas, quae non submersae fuerunt, deinceps spontanea confessione se reas aut nocentes esse significasse. E quibus satis palam liquet error VVieri, qui contendit, ob spiritus cohibitionem quasdam non submergi, cum nihil prohibeat, quin & alia spiritum suum fortiter cohibere valeant.

Quapropter non video, quid absurdi inde sequatur, si dicam, Spiritualis (Satanica nimirum) leuitate siue spiritu aëris Sagas in altū trahi, aut in superficie aquarū seruari, ne in ijs pereant. Sed obiecerit aliquis: Ergo ne igitur Satanas saluas & incolumes cupit hasce suas ministras? Quis amabo finis est illius attractionis siue supernatationis veneficarū? Nequaquā certè illarum conseruationem spectat. Sed sua naturali potentia ex permissu Dei Opt. Maximi eas in aquis sustinet, fouet & trahit, non quidem in hunc finem, ut seruentur aut liberentur: sed potius, ut Diabolica ipsarum necessitudo, & quod cum malis habeant genijs consortium, aspectantibus innotescat, ipsaeq; in maius & perniciosius corporis pariter & animae discrimen adducantur.

tur. Nempe Satanas ipse ceu minister & licitor
adiussa diuina exequendum destinatus, eas hac
ratione magistratui & vniuerso populo indica-
re, earumque impietatem puniendam esse vult
(imò nolens etiam volens cogitur) significare,
vt mercedem suam, quam promerita sint, acci-
piant. Omnes enim eos, quos ad scelestum aliquid
perpetrandum pellexit, tempore præsertim eo,
quo diuinæ Maiestati visum fuerit, ad extre-
mam perniciem vel lubentissimè adducit. Cau-
sas igitur naturales purgationis Sagarum per
aquam frigidam quærentibus non præter ra-
tionem ego dixerim: Causam efficientem illius
esse Spiritualem in ipsarum corpore, quæ à simili
in eo contenta leuitate oritur, attractionem:
Causam verò finalem, vt natura talium homi-
num manifestetur. Cum enim spirituum sub-
stantia mortalium visionem effugiat (Neque
enim ullus vel tractabilis vel aspectabilis est)
proposita purgatione tanquam medio conueni-
enti & idoneo, quod homines visu suo queant
percipere, utitur, vt cuius corpus videre non
possint, eius tamen voluntatem & legationem
cognoscant. Quibus consideratis non inanem
omnino, & pro nihilo habendam esse duco, Con-
sules prudentissimi doctissimiq;, vestram in ci-
uitate Lemgouiensi consuetudinem examinan-
di & purgandi Sagas per aquam frigidam.

Etiam si enim in sacrarum literarum monumentis nullum expressum de hac questione preceptum legatur: inde tamen haud consequitur, hanc in natura quoque nullam habere originis suae rationem. Infirmissima enim hac consequentia est & absurdissima: purgatio Sagarum per aquam frigidam in sacris literis non traditur aut precipitur. Ergo nulla quoque naturalis ratio eius dari potest. Multo ineptior est argumentatio. Purgatio Sagarum est contra naturam: ideoque non admittenda: Quia omne corpus hominis vinctum & ligatum non potest non submergere. Sententia haec est ignorantium principia physicorum, qui docent: Multa contingere praeter naturam quae tamen non sint contra naturam. Et eo ipso quod praeter naturam ista purgatio videatur, intelligitur aliquid singulare per eam significari: corpora videlicet Sagarum quae non pereant, aliter affecta & disposita esse, quam aliorum hominum corpora. Item: Quandoquidem in Euangelio nihil de ea legitur: Ergo impia est & minimè observanda. Multa sunt quae nec precipiuntur in Biblijs, nec prohibentur, & tamen suis de causis in Ecclesia à Theologis admittuntur, qualia sunt quae ab ijs dicuntur adiaphora. Nequaquam enim contra pietatem esse puto, eiusmodi suspectos homines in aquis purgare: praesertim quia propter hanc

hanc unam purgationem nulla condemnari so-
let. Et hæc sunt prudentissimi & doctissimi viri,
quæ ob vestram petitionem breuiter meditatus
fui. Saluum tamen Theologis, Iurisconsultis &
Philosophis, quorum omnium hæc quæstio com-
munis est, suum iudicium liberrimè lubentissi-
mèq; relinquens.

Scripta & data Lemgouia in comitatu Lip-
piensi, ex aedibus Domini Conradi Grothenij vr-
bis vestrae Typographi, 4. Octobris, Anni huius
1583.

P. & Cl.

Vestra

Addictiss.

Guilhelmus Adolphus
Scribonius Marpurgensis.

E

AD LECTOREM.



Esequentes pagellę vacarent, adiecta est epistola, ab H. Pistādro, qua ignotum veritatis patronum, amicū suum, ad edendum hanc de examine Sagarū per aquam frigidam disputationem adhortatur.

IGNO.

IGNOTO PATRONO,

AMICO SVO H. PL.

STANDER S.



V O D Bernardus olim de contentiosis verè pronunciauit: Pacem contemnentes & gloriam quærentes, pacem perdunt & gloriam: idem mihi, Patrone, ad Physiologum nostrum Scribonium aptissimè quadrare videtur. Quid. n. ille scriptionibus suis, si paucas φιλομεθόδως excipias, aliud venatur, quàm inanē gloriā? quid quærit aliud, quàm vt contradicendo omnibus ipse & Logicæ gentis dux fortissimus, & Rhetorum impudentissimus, & physicorum maximè ὡς δόξῃ habeatur: reliqui autem ad istum heroem collati homulli humi repant, ipsius imperium ferant, triumphali curru insidentem proni reuereantur. De Logicis enim eius commentationibus quid ad te hominem peritum scribam? Quid arrogantius, quàm vertiginosi capitis cogitationes, in coetu tertiæ classis discipulorum à semi-ebrio doctore eructatas, (quod sermo ut plurimum sibi non constans abundè testatur) publicas facere, triumphum ducere, Rami interpretes maledictis & anilibus iur-

giis impetere: sibi verò ipsi vbi libet & quando libet, interlinendi, addendi, mutandi in Rami Logica ius arrogare? Sed Scribonium qui nôrit, aliter facere non posse sciet. Vt enim iuxta Virgilium

Neglectis vrenda filix innascitur agris:

Sic ex præstanti illius ingenio, luxu, sordibus, & squalore tantum non deperdito, quid nunc nisi intemperans, biliosum, *κακόχυμον* proueniret? Respōdent enim ferè corporis temperamento, (sicut *κράσις* Græcorum Latini nominant) spiritus in cerebro nati: vnde dictorum & factorum fons quidam existit: quod & ipse Scribonius intelligeret facilè, nisi medicus videri, quàm esse, mallet. Rhetorem autem Gorgia Leontino & Sophistis veteribus, quorum nomen ob impudentiam passim exosum est, longè impudentiorem in Scribonii capite habitare duabus potissimum è rebus colligo. Primùm, quia loquacitate, cuius comitem esse vanitatem sapienter veteres dixerunt, putat se colorem addere posse suis paradoxis. Hinc à propriis locutionibus ad modificatas confugit, sub quibus tanquam Aiaceis clypeo lateat, cùm aquam sibi hærere deprehendit. Hinc ex musca elephantum, cum vult, extruit: & imperitis suis discipulis fumos

fumos pro veritatis luce vendit: denique vt Protheus quidam in omnes se formas convertit. Sed hæc adhuc tolerabilia, Patrone, in tam ἀκολάσω δοξοσόφῳ crederent, & sua ipsius miseria satis afflictum relinquerent homines eruditi: nisi ad alios etiam deformandos hæc lentigo progrediretur. Cum enim apostrophas nominatim ad eos instituit; quos pro sua libidine impetere audet, quàm lepidè est maledicus? quàm in sarcasmis quovis cane & angue, mordacior? denique in bonorum fama suggillanda quàm extremè impudens?

Videres, Patrone, ultimum eius subscriptū nomine λογικόν, reapse ἄλογον: multoties illic impudentissimè mentiri dicit aduersarium suum, virum stylo & ingenio admodum moderato, vt ex multis prædicari audio. Ex nomine verò antagonistæ sui quàm scurrilis sibi ipsi delicias siue ventulos Plautinos facit? Reliquos eius generis flosculos omitto. An non egregius tibi hoc modo videtur Rhetor? sibi certè in hoc luto volutatus mirè placet.

Iam quod ad paradoxa physica attinet, quibus novator ille ad immortalitatem adfectat viam; vnicum illud instar multorum esse potest, de Sagarum per aquam frigidam

purgatione. Deprehensum fuit superioribus annis, mulieres, quæ in suspicionem de commercio cum Satana venissent, in profluentem coniectas supernataſſe, nec vlla ratione ſubmergi potuiſſe. Hinc quaſitum à prouidis illorum locorum magiſtratus fuit, an eius rei naturales aliqua cauſa deprehendi poſſent: quo poſito ſequeretur, illam ſupernatationem pro certo reatus indicio haberi debere: vnde facilimè euinci poſſet, quæ huius criminis reæ eſſent, nec ne: quod alioquin ambiguum inquitu, & diiudicatu difficilimum ſapientiffimi quique iudices, omni tempore cenſuerunt. Adfuit forte ad eiufmodi ſpectaculum noſter Scribonius.

Differtantibus igitur & pendentibus in incerto hac de re reliquis, ipſe ſtatim; videri ſibi eius rei rationes naturales eſſe; reſpōdit.

Quam etiam opinionem nullis neque diuinis, neque humanis rationibus probabilem paulò poſt in ſua epiſtola audacter expoſuit: audaciùs publicis typis diuulgauit: nunc verò audaciſſimè, imò impudentiſſimè ad rauim vſque maledictis & ſcommatibus in demortuos etiam viros graues & eruditos debacchatus, in publico doctorum huius ſeculi hominum theatro, defendere non

non erubescit. Sed quid erubesceret ille, à quo pudor, cuius signum siue vehiculum potius quoddam est rubor, omnis exulat? Sparsa est initio, vt nosti, *δαυμασὸς* illa καὶ *ῥῆγμα* *δοξῶ* epistola longè lateque: sed omnium eruditorum iudicio, quos mihi quidem ab eo tempore hac de re iudicantes audire contigit, (audiui autem neque paucos, neq; iudicii expertes) explosa est opinio illa: imò ipse auctor, qui ob labores in physicam insumptos à bonis diligebatur, multis suspectus fieri, & de existimatione ingenii ac censendi acrimonia apud ipsos Scriboniani nominis amantes periclitari Scribonius coepit. Iudicabant enim multi periculosissimam hanc esse censendi in philosopho temeritatem: quippe quæ iudicibus simplicioribus animum addere posset, vt in comburendis illius generis mulierculis strenuè pergerent: quæ tamen capitales sententiæ deinceps, ne fortassè meliùs perspecta irritæ non fierent: etsi sententiam suam Scribonius meliora edoctus, vt decet *φιλαλήθεις*, mutaret. Vt igitur Scribonium in hac ardua quæstione non sine præiudicio errantem erudirent, multi certatim viri docti, tanquam ad incendium extinguendum, ad eruendum hanc rebusp. pestiferam opinio-

nem, & priuatim & publicè accurrerunt. Et publicè quidem ab Evvichio, pię memorię, sene pio, & tam doctrina quàm experientia præstanti, eleganter est hoc deliriū, dissimulato auctoris nomine, confutatū. In Academia quoq; Marpurgenſi liberrimo iudicio philoſophus Goclenius publica oratione panegyrica, quæ typis procuſa deinde eſt, idē thema diſceptando contra Scriboniū, ſicut & deinceps pluſculis diſputationibus publicis, concluſit. Tum Neuvvalduſ Helmſta- tenſis Academiae Profeſſor breuiter & accuratè, monſtratiſ abſurditatum ex hoc dogmate conceſſo promanantium cumulis, ad epiſtolam illam reſpondit. Priuatas verò magnorum virorum admonitiones, & hac derepaſſim perſcripta iudicia, quæ ignorare Scriboniuſ niſi ebriuſ, negare niſi improbuſ non poteſt, omitto. Sed quod hoc ſuo labore ſecuti ſunt hi tot & tanti viri, ſuntne etiam aſſecuti? Nihil certè minus. Cum enim iugulatum hoc dogma & ſepultum crederetur, en Scriboniuſ noſter figmentum ſuum noua impudentiæ ceruſſa pictum, & inſigni linguæ petulantia oblitum ruruſ in publicum producit, & Phyſiologiæ Sagarum titulo imperitiſ vendit: eum tamen de aliis infinitis ferè in hoc genere

nere

nere quæstionibus, nihil nisi pervulgatum,
 & ex Bodino, Wiero, Eraſto, Sprengero
 Monacho, ferè ad verbum deſcriptum pro-
 ferat: ſed hoc vnum agat, vt priorem ſenten-
 tiam de Sagis ſupernatantibus vindicet:
 quia *δοξοσόφω* ingratum fuerat reprehendi;
 quod nemini *φιλοσόφω* in errore verſanti in-
 gratum eſſe poteſt aut debet. Cum au-
 tem veritas ita illum percelleret, vt ſimpli-
 citer tueri, quod ſemel publicum fecerat,
 non poſſet, neque fortasſe viuo Evvichio
 vellet, tandem mortuum Evvichium &
 Neuvaldum procul abſentem hac ipſa
 Phyſiologia illiberaliſſimè perſtringit, mor-
 det, vellicat, manibus pedibusq; veritati ob-
 ſtrepit, & quod de ſæpia piſce Plinius com-
 memorat, atra ſe ſpuma inuoluit, ne erro-
 neam defendiſſe opinionem videatur. Go-
 clenium autem, quem & in vicinia habita-
 re, & ad eiufmodi nugas refellendas, ſi per
 occupationes liceret, ab eruditione inſtru-
 ctiſſimum eſſe nouit, nominatim non at-
 tingit: quamuis eius argumenta aliquoties
 irridendo obſcurare conetur: quam ratio-
 nem ſemper philoſophis eſſe indignam ha-
 bitam, Plato eſt teſtis, in cuius Gorgia So-
 crates Polum Rhetorem hanc ipſam ob
 cauſam grauiter reprehendit. Sed hic philo-

fophandi modus, Patrone, qualem Scribonius adhibet, an non ab agyrtis tibi petitus videtur, qui vt medicamenta sua adulterina in vulgus commendent, omnes veram medicinam factitantes præ se contemnunt; suas ipsi laudes alta voce decantant; habitu se splendido vel mutuum sumpto ostentant? Euolue quæso, Patrone, eam quam dico Physiologiam, videbis quàm scurrilibus sarcasmis & ironiis Evvichio & Neuvvaldo nouus iste paradoxorum mangonifator illudat. Inter alia ad virgas optimum senem condemnat: non absimili impudentia, qua paucis abhinc annis quidam mathæologus venerandum senem D. Sturmium, non sine suorum etiam quorundam indignatione lusit. Vbi verò ad seipsum deuenit, hîc triumphum cantat, hîc vermium abactiones & nescio quæ commemorat. Deniq; vt nihil ad comendam suam Helenen desiderari patiatur, vndique conquirat fucos, quibus illam exornet. Hinc de testibus & aliis rebus quædam à IC^{tis} deprompta suis nugis infarsit: quæ tamen, etsi planè heterogenea sunt, tam inepta & longissimè detorta non sunt, quàm illa, quæ ex Theologia de sacro Baptismo aspergit, item quæ de dæmoniacis huc accommodauit. Quibus omni-

mnibus magnam se huic quæstioni lucem
 attulisse, & egregiè expeditum se esse ratio-
 num vinculis, quibus irretitus tenetur, au-
 tumat: interim verò omnes methodi Ra-
 meæ leges à se triumphatore Rameo nus-
 quam obseruatas nō deprehendit. Sed hæc
 omnia, & quæ sunt reliqua, malo te ex ipso
 scripto cognoscere. Differui aut̃ hæc apud te,
 Patrone, prolixiùs, vt te pro excellenti tua
 eruditione & iudicii constantia permoue-
 rem, quò breuiter rationes illas nouas col-
 lectas refutares, & metonymiam quoq; au-
 ctori eriperes. Quod si, vt potes, præstare vo-
 les, veritatis patrociniò magnam apud opti-
 mos quosq; gratiam inibis, & hanc animis
 hominum opinionem eximes, Scriboni-
 um veri amore adductum hucusque tam
 pertinaciter, vt de aris & focis, sic de hoc ob-
 tinendo paradoxo, dimicasse. Neque est,
 quod verearis, vt & tibi labem lutulentus
 ille adspergat. Nam, vt eleganter à veteri-
 bus dictum est, maledicta in veritatem vite-
 que innocentiam, vt ignis in aquam conie-
 ctus, continuò euanescent. Nullæ vnquam
 tam firmæ adferentur rationes vel in logi-
 cis, vel in physicis, quibus hic Rhetorculus
 non obganniat. Tu modò, quæ coram
 differentem te sæpe cum voluptate hac ipsa

dere amici audiuerunt, veritatis propaganda studio, cum aliis bonis viris communicare necessato. Vale.

EPIGRAMMA ADSCRIBONIVM.

Q Vos prisca quondam secula
 Tulère, vates Bacchico
 Certasse noctu munere
 Et putuisse interdiu,
 Testatur en Horatius.
 Hoc fecit ille; patria
 De cuius implacabile
 Septem urbibus certamen est.
 Hoc fecit Ennius pater.
 Nostriq; turba temporis
 Vt maximè illis carminum
 Concedat elegantia:
 Hac parte non cedit tamen,
 Studetq; prisci seculi
 Vinositatem vincere.
 Ergo camænas fundier
 Lyæum olentes non noua
 Nec mirares est, sed vetus.
 Et re licet illaudabilis:
 Non fæda consuetudine
 Tamen, populi & sententia,
 Sed mirares est & noua,
 Insueta, abominabilis,

Vel

*Vel plebe turpis iudice;
 Nunc inueniri, qui sophi
 Volunt haberi, qui suis
 Telluris omnes angulos
 Replere commentarijs
 Student, studentes gloria.
 Quos conueniebat maximè
 Se sobrios ostendere;
 Quacunq; mentem & de statu
 Turbare possunt, sedulo
 Vitare. Sed contrarium
 Aetate nostra cernimus.
 Scribonij scribacitas
 Exempla nobis præbeat,
 Hunc fama veri nuncia
 Refert libellos cudere,
 Et se nihil dignum dare,
 Nisi, cum mero totus madet,
 Plenusq; ad ipsa guttura est.
 Ructare tunc primùm occipit
 Vomit hinc suas ineptias,
 Illiberalia scommata,
 Risus, sales, conuicia
 Indigna sobrio sopho.
 A quo nisi Scribonius
 In posterum sibi temperet,
 Docto sophorum de grege
 Eliminabitur procul.*

*Ne sana fortè pectora
 Contagio fœdissimo
 Morbi sui contaminet
 Et ex modestis, seu velint
 Nolintve, reddat tetricos,
 Truces, feroces, asperos:
 Vt eum retundant tetricum,
 Trucem, ferocem & asperum,
 Et par pari retalient.*

DISTICHON AD EVNDEM.

*Scribere, Scriboni, promptè tibi posse videris.
 Mirum, scribendi nî cacoëthes habes.*

ERRATA SIC COR-
 rige.

Pag. 15. lin 12. lege. Denique si ex causa de
 effectu iudicandum est. pag. 22. versu 10. leg.
 pristinam earum formam periisse. pag. 27.
 linea 18. lege Aether stellarum luce coru-
 scus visu, &c. pag. 31. vers. 26. leg. In posterum
 existunt leuia. pag. 33. vers. 22. leg. quo nata-
 torum. pag. 50. vers. 9. leg. allegari. pag. 56.
 vers. 28. pro ignoto lege ignito.

F I N I S.

de
eg.
27.
ru-
um
ita-
56.